



Kamis, 09 November 2023

Ogen: Lukas 4:18-19



"Mulahi Si Tertaban"



Melala penyebab maka kalak banci tertaban. Tertaban pusuhna nandangi perbahanen si la uli umpamana: erjudi, erselingkuh, muat bagin si la jadi baginna. Tertaban pikirena erkiteken melala si man pikiren, umpamana: erpikir uga nggalari utang, masa depan anak-anak, usaha si maun kurang berhasil. Tertaban erkiteken ngelakoken sada perbahanen si ngerugiken kalak seh maka ia masuk penjara. Ketertabanen si peteluken e, la banci i pulahi adi lenga keru masa hukumenna. Ketertabanen si pemena ras si peduaken e banci i pulahi alu penampat ahlina bage pe kalak si tertaban e nggit i pulahi arah ketertabanenna.

Selaku Moria pe kita megati i taban perukurenta bage pe sura-suranta. Sura-sura guna ndatken sada benda/barang seh maka lanai kita banci tunduh adi lenga si dat kai benda/barang si isuraken kita e; piahna tangkel pinakit. Adina si taban pusuh entah pe pikirenta nandangi sada-sada hal si kin e mabai kita sakit labo kal min man usur-usuren. Si bebasken min dirinta, pusuhna arah ketertabanen nari gelah kita jadi manusia si bebas. Uga ninta banci nampati dengen mulahi kalak sitertaban adi kita pe tertaban denga. Kita mere man kalak kerna kai si lit bas pusuh-dirinta. Adi pusuhna teneng tentuna kita mereken ketenangan man sekelewetta; adi pusuhna benar tentu perbahanen nandangi sekelewetta pe benar tapi adina kita kin pe tertaban denga mesera nge si akap mulahi kalak si tertaban. Emaka marilah si pulahi lebih dirinta arah hal-hal si banci naban kita gelahna kita pe ngasup mulahi kalak si tertaban. Dibata Bapa si sembah kita e, nggo mulahi kita arah ketertabanen nari, e me arah kematen nari ras kuasa-kuasa si jahat nari. Oratna ka lah kita pe mulahi teman-temanta arah ketertabanenna nari.